



Broj: 01/14-04-6533/22
Sarajevo, 23.09.2022. godine

GRADSKO VIJEĆE GRADA SARAJEVA

N/r g. Jasmin Ademović, predsjedavajući Gradskog vijeća

Predmet: Amandmani na Prijedlog Odluke o uslovima i načinu dodjele „Šestoaprilske nagrade Grada Sarajeva“, *dostavlja se*

Poštovani gosp. Ademović,

U skladu sa članom 124. stav (2) i stav (3), a u vezi sa. stavom 6. Poslovnika Gradskog vijeća Grada Sarajeva („Službene novine Kantona Sarajevo“, br. 28/09, 11/20 i 19/20), na Prijedlog Odluke o uslovima i načinu dodjele „Šestoaprilske nagrade Grada Sarajeva“, a koji je dostavljen kao materijal za 19. sjednicu Gradskog vijeća Grada Sarajeva zakazanu za dan 05.10.2022. godine, podnosim Amandmane, kako slijedi:

AMANDMAN I

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 2. se u cijelosti briše, tako da dosadašnji član 3. postaje član 2, i tako dalje.**

Obrazloženje:

Amandmanska intervencija je učinjena iz razloga što je navedeni član potrebno u skladu sa nomotehničkim pravilima uvrstiti u dio propisa koji se odnosi na Prijelazne i završne odredbe.

AMANDMAN II

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 5. stav (1) mijenja se i to tako da se iza riječi nagrade, stavlja zarez i dodaje tekst „bez obzira na oblast“, dok ostali dio teksta člana 5. stav (1) ostaje neizmijenjen.**

Obrazloženje:

Obzirom da nije naglašeno da se kriteriji cijene prilikom razmatranja svake oblasti u kojima se Nagrada dodjeljuje i da nisu posebno razrađeni kriteriji za svaku pojedinačnu oblasti, bilo je nužno u propisu amandmanski intervenirati na način da se jasno reguliše da se taksativno navedeni kriteriji odnose na sve oblasti.



AMANDMAN III

U Prijedlogu Odluke o uslovima i načinu dodjele „Šestoapriilske nagrade Grada Sarajeva, **član 5. stav (1), tačka a), alineja 4)** se mijenja i to tako da se iza riječi značajnih, dodaje tekst „domaćih i međunarodnih rezultata“, dok ostali dio teksta člana 5. tačka a), alineja 4), ostaje neizmijenjen.

Obrazloženje:

Ovim amandmanom se nastojao posebno istaći značaj rezultata koji se imaju cijeliti u u oblastima u kojima se dodjeljuje Nagrada.

AMANDMAN IV

U Prijedlogu Odluke o uslovima i načinu dodjele „Šestoapriilske nagrade Grada Sarajeva, **član 5. stav (1), tačka a), alineja 6)** se mijenja i to tako da se iza riječi inovacije briše interpunkcijski znak ; i dodaje tekst „i rezultate kojima se promovise grad Sarajevo i/ili Bosna i Hercegovina;“.

Obrazloženje:

Obzirom da se Nagrada dodjeljuje za doprinos promociji grada Sarajeva /ili Bosna i Hercegovina bilo je potrebno naglasiti da inovacije, kao i rezultati trebaju da se cijene sa aspekta promocije grada Sarajevo i/ili Bosna i Hercegovina.

AMANDMAN V

U Prijedlogu Odluke o uslovima i načinu dodjele „Šestoapriilske nagrade Grada Sarajeva, **član 5. stav (1), u tački b)** briše se tekst „za pravna lica“ i dodaje novi tekst koji glasi „za kolektiv“.

Obrazloženje:

Obzirom da su u predloženom članu 5. u tački a) navedeni kriteriji za pojedince i grupe, kao dobitnike Nagrade, ova intervencija u tekst je bila nužna jer ne postoji kategorija pravna lica kod dodjele Nagrade, već kategorija Kolektiv.

AMANDMAN VI

U Prijedlogu Odluke o uslovima i načinu dodjele „Šestoapriilske nagrade Grada Sarajeva, **član 5. stav (1), tački a), alineja 8)** se u cijelosti briše.

Obrazloženje:

Ovaj kriterij će se cijeliti neovisno od svih ostalih kriterija i kategorije dobitnika Nagrade, tako da će se kasnijim amandmanskim intervencijama uvesti kao poseban stav.

AMANDMAN VII

U Prijedlogu Odluke o uslovima i načinu dodjele „Šestoapriilske nagrade Grada Sarajeva, u **članu 5. dodaje se novi stav (2) čiji tekst sada glasi: „Neovisno o ispunjavanju kriterija za dodjelu Nagrade iz prethodnog stava ovog člana, prilikom razmatranja kandidature vodit će se računa da kandidat za dodjelu Nagrade posjeduje ugled i visoke moralne vrijednosti“.**

Obrazloženje:

Isto kao u Amandmanu VI.

AMANDMAN VIII

U Prijedlogu Odluke o uslovima i načinu dodjele „Šestoaprilske nagrade Grada Sarajeva, u **članu 6. stav (3) se mijenja i sada glasi:** „Javni poziv će putem nadležne Stručne službe za poslove Gradskog vijeća Grada Sarajeva biti dostavljen i afirmiranim strukovnim udruženjima od značaja, kao i sindikatima iz oblasti u kojima se Nagrada dodjeljuje“.

Obrazloženje:

Prilikom izrade ovog Amandmana predlagač je uzeo u obzir ranije Amandmane gradskih vijećnika prilikom razmatranja prijedloga Odluke, a ovim se istovremeno postiže i bolja promocija Nagrade i utiče na povećanje broja kandidatura i time konkurentnost.

AMANDMAN IX

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 7. mijenja se i sada glasi:**

- (1) „Nagrada se dodjeljuje:
 - a) Pojedincu;
 - b) Grupi (okupljenim pojedincima na realizaciji određenih poslova s rezultatima koji se mogu razmatrati u kandidaturi za dodjelu Nagrade kao značajna ostvarenja, odnosno značajni rezultati rada);
 - c) Kolektivu (privatnom ili javnom privrednom društvu, ustanovi, udruženju i drugom pravnom subjektu s područja Grada Sarajeva, kao i onom van područja Grada Sarajeva ako se njihova ostvarenja, odnosno rezultati rada odnose na doprinos gradu Sarajevo).
- (2) Pojedinaac kojem se dodjeljuje Nagrada mora biti državljanin Bosne i Hercegovine, dok grupe ili kolektivi moraju djelovati ili biti registrovani za obavljanje svoje djelatnosti na teritoriji Bosne i Hercegovine.“

Obrazloženje:

Radi boljeg definiranja kategorija dobitnika Nagrade izvršene su navedene amandmanske intervencije, a posebno je bilo značajno definirati bh državljanstvo Pojedinaca odnosno djelovanje/registraciju Grupa ili Kolektiva koji mora biti vezan za Bosnu i Hercegovinu.

AMANDMAN X

U Prijedlogu Odluke o uslovima i načinu dodjele „Šestoaprilske nagrade Grada Sarajeva, u **članu 8. stav (1), iza riječi organima uprave svih nivoa vlasti u Bosni i Hercegovini, iza interpunkcijskog znaka zarez, dodaje se tekst:** „političkim strankama/partijama“, dok ostali dio teksta člana 8. stav (1) ostaje neizmijenjen.

Obrazloženje:

Značajno je navesti da u izuzetke spada i kategorija političkih stranaka/partija uz ostale izuzetke koji sugeriraju poziciju vlasti i politiku.

AMANDMAN XI

U Prijedlogu Odluke o uslovima i načinu dodjele „Šestoapriilske nagrade Grada Sarajeva, u **članu 9. mijenjaju se stavovi (2) i (3) i sada glase:**

- (2) „Kada se Nagrada dodjeljuje Grupi, svaki član Grupe dobiva Povelju identičnog sadržaja, sa naznačenim imenima i prezimenima svih članova Grupe.
- (3) U slučaju da se Nagrada dodjeljuje Grupi, novčani dio nagrade iz stava 1. ovog člana raspoređuje se članovima grupe na jednake dijelove.

Obrazloženje:

Značajno je navesti da u izuzetke spada i kategorija političkih stranaka/partija uz ostale izuzetke koji sugeriraju poziciju vlasti i politiku.

AMANDMAN XII

U Prijedlogu Odluke o uslovima i načinu dodjele „Šestoapriilske nagrade Grada Sarajeva, u **članu 10. stav (1), iza riječi Povelja, briše se dio teksta „iz člana 8. stav (1) i (2) Odluke“, dok ostali dio teksta člana 10. stav (1) ostaje neizmijenjen.**

Obrazloženje:

Bespotrebno je referiranje na član u kojem se spominje Povelja jer se kod „Šestoapriilske nagrade Grada Sarajeva“ misli na istu Povelju.

AMANDMAN XIII

U Prijedlogu Odluke o uslovima i načinu dodjele „Šestoapriilske nagrade Grada Sarajeva, **član 11, stav (2) se mijenja i sada glasi:**

„Nagrada se istom licu, bez obzira na kategoriju dobitnika Nagrade, može dodijeliti samo jedanput“.

Obrazloženje:

Ovom amandmanskom intervencijom se postiže bolja jasnoća odredbe.

AMANDMAN XIV

U Prijedlogu Odluke o uslovima i načinu dodjele „Šestoapriilske nagrade Grada Sarajeva, **član 13. mijenja i sada glasi:**

”

- (1) Pravo predlaganja kandidata za Nagradu imaju privredna društva, ustanove, udruženja građana, grupe od najmanje 200 građana i druga pravna lica sa područja Grada Sarajeva, kao i raniji dobitnici „Šestoapriilske nagrade Grada Sarajeva“.
- (2) U slučaju da Nagradu predlaže grupa od najmanje 200 građana kako je to predviđeno u prethodnom stavu ovog člana, dužna je u pismenoj formi dostaviti spisak građana koji obavezno mora da sadrži: puno ime i prezime građanina, broj lične karte i organ izdavanja sa područja Grada Sarajeva i svojeručni potpis građanina.
- (3) Subjekti iz stava (1) ovog člana nemaju pravo isticanja sopstvene kandidature za Nagradu.
- (4) Prijedlog iz stava (1) ovog člana podnosi najviši kolektivni organ upravljanja u skladu sa zakonom ili najvišim pravnim aktom tog organa, i to odlukom tog organa o podnošenju prijedloga kandidata za Nagradu. Predlagač je dužan dostaviti pismenu saglasnost kandidata

- da prihvata kandidaturu za predloženu oblast, kao i izvod iz važećeg zakona ili najvišeg pravnog akta kojim dokazuje da je riječ o najvišem kolektivnom organu upravljanja.
- (5) Pravo predlaganja kandidata za Nagradu ima i gradonačelnik Grada Sarajeva.
 - (6) Političke stranke/partije ne mogu biti predlagači kandidata za Nagradu.
 - (7) Za dodjelu Nagrade ne može se predložiti kandidat koji u momentu predlaganja nije živ.“

Obrazloženje:

Ova amandmanska intervencija na način da je izmijenjen cijeli predloženi član ima za cilj da detaljno razradi mnoge nejasnoće i probleme u postupku od podnošenja razmatranja kandidature do toga tko može podnijeti, kao i mogućnost predlaganja kandidata posthumno. Ovom izmjenom je postignuta jasnoća odredbe, te su otklonjene sve ranije nejasnoće i dileme koje su postojale u praksi.

AMANDMAN XV

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 14. stav (1) se mijenja i sada glasi:**

„Prijedlog kandidature dostavlja se u dva (2) primjerka sa detaljnim podacima i obrazloženjem i potrebnom dokumentacijom“

Obrazloženje:

Ovim amandmanom vrši se racionalizacija broja primjeraka kandidature koji se dostavljaju i za predlagače i za Stručnu službu koja radi na administrativnim poslovima oko dodjele Nagrade.

AMANDMAN XVI

U Prijedlogu Odluke o uslovima i načinu dodjele „Šestoaprilske nagrade Grada Sarajeva, u **članu 15. u cijelosti se briše stav 7.**

Obrazloženje:

Brisanje ovog stava je iz razloga što Prijedlog Odluke u članu koji regulira mandat članova Odbora regulira ovo pitanje.

AMANDMAN XVII

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 16. mijenja i sada glasi:**

- „(1) Odbor iz prethodnog člana ove odluke, na prvoj sjednici donosi Poslovnik kojim se uređuje način rada Odbora, a posebno se definiše tajnost rada Odbora u pogledu njihovog rada, načina razmatranja kandidatura i glasanja i imena kandidata za dodjelu do donošenja konačne odluke Gradskog vijeća o dodjeli Nagrada, a kako je to detaljnije definisano ovom odlukom.
- (2) Poslovnikom iz prethodnog stava ovog člana uredit će se i zajedničko razmatranje predloženih kandidata od strane članova Odbora prije procesa glasanja.“

Obrazloženje:

Ova amandmanska intervencija ima za cilj postizanje jasnoće odredbe, a uvažavajući činjenicu da će Odbor sva ostala pitanja regulisati svojim Poslovnikom o radu.

AMANDMAN XVIII

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 18. mijenja i sada glasi:**

”

- (1) U prvom krugu članovi Odbora glasanjem utvrđuju liste kandidata koji zadovoljavaju uslove propisane Odlukom i Javnim pozivom u pojedinačnim oblastima.
- (2) U drugom krugu glasanja Odbor primjenjuje način bodovanja preciznije utvrđen Poslovníkom o radu te Gradskom vijeću predlaže najmanje dva (2) prvorangirana kandidata, ako ih je bilo dva ili više, u suprotnom jednog ukoliko je jedan kandidat dobio minimalan broj bodova većine od ukupnog broja članova Odbora.
- (3) Gradsko vijeće donosi konačnu Odluku javnim glasanjem na sjednici Gradskog vijeća zatvorenoj za javnost.“

Obrazloženje:

Ova amandmanska intervencija ima za cilj postizanje jasnoće odredbe, a uvažavajući činjenicu da će Odbor sva ostala pitanja regulisati svojim Poslovníkom o radu. Pitanje javnog glasanja je iz razloga što je to bio raniji amandmanski zahtjev gradskih vijećnika, a sjednica je zatvorena za javnost iz razloga kako bi se osigurao miran rad gradskih vijećnika i izostanak bilo kakve vrste pritiska javnosti na proces odlučivanja.

AMANDMAN XIX

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 20. mijenja i sada glasi:**

”

- (1) Članovi Odbora se obavezuju na tajnost svih podataka o kandidatima.
- (2) Članovi Odbora se obavezuju da neće davati izjave u medije ili preko društvenih mreža, sve do zvanično upućenog prijedloga odluke/a Gradskom vijeću Grada Sarajeva.
- (3) Član koji prekrši obaveze iz prethodnih stavova ovog člana suspenduje se od daljnjeg rada u Odboru većinom glasova članova Odbora.
- (4) Obrazloženi prijedlog za suspenziju može uputiti bilo koji član Odbora, gradski vijećnik i gradonačelnik.“

Obrazloženje:

Ovom amandmanskom intervencijom postiže se bolja jasnoća odredbe, te se detaljno regulira postupak kršenja obaveze tajnosti rada Odbora.

AMANDMAN XX

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 21. mijenja i sada glasi:**

„Članovi Odbora imaju pravo na naknadu za svaku održanu sjednicu u istoj visini naknade koja je utvrđena kao i za ostala radna tijela Gradskog vijeća Grada Sarajeva.“

Obrazloženje:

Ovom amandmanskom intervencijom postiže se bolja jasnoća odredbe, te se regulira pravo na naknadu članova Odbora, ali tako da imaju pravo na naknadu za svaku održanu sjednicu ali u visini kao i članovi radnih tijela Gradskog vijeća.

AMANDMAN XXI

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 25. mijenja i sada glasi:**

”

- (1) Dodijeljena Nagrada može se oduzeti.
- (2) Pod oduzimanjem Nagrade podrazumijeva se oduzimanje Povelje i dodijeljenih novčanih sredstava.
- (3) Nagrada se oduzima ako je dobitnik Nagrade pravosnažnom sudskom presudom osuđen od strane Međunarodnog suda za ratne zločine počinjene na teritoriji bivše Jugoslavije ili od bilo kojeg suda sa područja Bosne i Hercegovine za neko krivično djelo ili ukoliko je svojim dokazanim djelovanjem na bilo koji način narušio ugled Grada Sarajeva i države Bosne i Hercegovine.
- (4) Zvanični prijedlog za oduzimanje Nagrade može po saznanju ili prijavi bilo kojeg lica o ispunjenosti uslova za oduzimanje Nagrade podnijeti gradonačelnik ili gradski vijećnik, a isti se potom dostavlja Komisiji za izbor i imenovanja Gradskog vijeća Grada Sarajeva koja ispituje opravdanost zahtjeva i, u slučaju da utvrdi osnovanost zahtjeva, podnosi prijedlog Odluke o oduzimanju dodijeljene Nagrade Gradskom vijeću Grada Sarajeva.“

Obrazloženje:

Do sada nije bila razrađena procedura oduzimanja Nagrade, a i pravila se distinkcija za krivična djela za koja Dobitnik može biti osuđen, te nisu bili navedeni slučajevi narušavanja ugleda grada ili države. Obzirom na značaj Nagrade i ovog pitanja sada je detaljno putem amandmana razrađen ovaj značajan član.

AMANDMAN XXII

U Prijedlogu Odluke o uslovima i načinu dodjele „Šestoaprilske nagrade Grada Sarajeva, **član 26. mijenja i sada glasi:**

”

- (1) O oduzimanju nagrade odlučuje Gradsko vijeće Grada Sarajeva.
- (2) Odluka o oduzimanju Nagrade objavljuje se u „Službenim novinama Kantona Sarajevo“ i sredstvima javnog informisanja, kao i na zvaničnoj web stranici Grada Sarajeva, a dobitniku Nagrade se šalje i pismena obavijest.
- (3) Dobitnik Nagrade kojem je oduzeta Nagrada je dužan u roku od najkasnije 30. dana od dana stupanja na snagu Odluke o oduzimanju Nagrade, Gradu Sarajevu vratiti dodijeljenu Povelju i cjelokupni isplaćeni iznos, a što se zapisnički konstatuje.“

Obrazloženje:

Ovom amandmanskom intervencijom postiže se bolja jasnoća odredbe, te se detaljno regulira postupak oduzimanja Nagrade.

AMANDMAN XXIII

U Prijedlogu Odluke o uslovima i načinu dodjele „Šestoaprilske nagrade Grada Sarajeva, naziv člana i **član 27. mijenja i sada glasi:**

”

Član 27.

(Posthumna uručnja Nagrade)

Ukoliko priznanje, odnosno Nagrada nije uručena dobitniku za života, predaje se članovima uže porodice (bračni drug, djeca, usvojenici i roditelji), ili izuzetno, drugom članu porodice ukoliko dobitnik nema članova uže porodice i o tome se izdaje potvrda.“

Obrazloženje:

Ovim članom se reguliše situacije ukoliko je Dobitnik nagrade u momentu proglašenja Odlukom Gradskog vijeća Grada Sarajeva bio živ, ali u momentu dodjele/uručnja nije živ, te je, s tim u vezi, radi jasnoće odredbe bilo nužno promijeniti naziv člana, te regulisati i situacije kada se Nagrada ne može uručiti nabrojanim članovima uže porodice obzirom da ih umrli Dobitnik nema.

AMANDMAN XXIV

U Prijedlogu Odluke o uslovima i načinu dodjele „Šestoaprilске nagrade Grada Sarajeva, iza člana 27. dodaje se novi član 28. koji glasi:

”

Član 28.

(Ravnopravnost spolova)

Odredbe ove odluke odnose se podjednako na lica muškog i ženskog spola, bez obzira na rod imenice upotrebljen u tekstu ovog propisa.“

Obrazloženje:

U prijelaznim i završnim odredbama svakog propisa nužno je postojanje ovog člana radi uvažavanja ravnopravnosti spolova, te je ovaj član koji je slično bio reguliran na početku Prijedloga Odluke sada amandmanski premješten u ovaj dio propisa.

AMANDMAN XXV

U Prijedlogu Odluke o uslovima i načinu dodjele „Šestoaprilске nagrade Grada Sarajeva, iza člana 28. dodaje se novi član 29. koji glasi:

”

Član 29.

(Stručni i administrativni poslovi)

Stručne i administrativne poslove za potrebe Odbora, kao i evidencije o dodijeljenim Nagradama, vrši Stručna služba za poslove Gradskog vijeća Grada Sarajeva.“

Obrazloženje:

Potrebno je propisom precizirati tko vrši stručne i administrativne poslove, a obzirom da je to u djelokrugu rada Stručne službe za poslove Gradskog vijeća, tako ova amandmanska intervencija ima svoje uporište.

GRADONAČELNICA

Dostaviti:

- Naslov;
- a/a.

Doc. dr. Benjamina Karić